

Danki Betico pa tur loke bo a haci pa Aruba

Partido MEP ta recorda su lider Fundador Inmortal Betico Croes

ORANJESTAD (AAN): Diamars 25 di januari ta un dia special pa henter comunidad Arubano, un dia riba cual ta recorda e natalicio di e estadista di mas grandi den historia di Aruba, esta awe den feliz memoria Gilberto Francois (Betico) Croes.

Betico Croes a nace 67 aña pasa y durante su bida el a hiba un lucha tenaz pa logra realisa e anhelo di mas grandi cu ta biba den curazon di tur Arubiano, esta pa e isla aki haya su Status Aparte.

Pa por a logra e ideal aki Betico a funda dia 9 di februari 1971 e partido prestigioso Movimiento Electoral di Pueblo (MEP) cu a bira e vehiculo principal den su lucha.

Den tur e manifestacionnan den pasado Betico tabata den promer fila y tabata guia e masa di conciudadonan



balente, manera entre otro den e Manifestacion masal di 1973, e Marcha di Libertad na 1975, Inauguracion di himno y bandera na 1976, e accionnan na augustus 1977,

Tambe e tabata e lider den tur e delegacionnan cu a bay den exterior pa busca sosten cerca paisnan bisina, Hulanda, Inglatera, Nacionnan Uni y den tur e Conferencianan di Mesa Rondo.

Betico tabata un politico visionario cu den e comunidad dividi di e tempo ey a percura pa primeramente uni e pueblo aki. E union aki ta e base principal pa logra e Status Aparte. Introduccion di himno, bandera, escudo y ortografia ta valornan indispensable pa un pais cu kier ta autonomo den Reino Hulandes.

Inhusticia grandi a worde cometi contra Betico na momento cu el a worde hinca den prison pa un supuesto arma daña cu a worde haya den su auto. Tambe na 1983 caminda den un forma

traicionero el a worde tira riba veld di Winston na Santa Cruz.

Sin embargo nada por a para Betico pa concretisa e deseo di e pueblo aki. Ni e cierre di Lago na 1985 a impidie di sigui te na final pa porfin dia promer di januari 1986 Aruba a haya su Status Aparte.

Riba e dia di su natalicio ta e momento propicio pa un y tur reflexiona riba e logro grandi di Betico, e Status Aparte cu un y tur ta biba den dje awe. Tambe e ta un dia pa henter comunidad muestra nan gratitud na Betico, pa su

lucha, su sacrificio, su sanger cu el a drama pa awe un y tur por cana cara na laira y bisa cu "Nos ta liber, Nos tin nos Status Aparte".

Partido MEP ta invita henter comunidad pa presencia tanto e acto protocolar como e ceremonia cultural cu lo tuma lugar diamars riba Plaza Libertador Betico Croes.

Asistiendo den forma masal y hisando durante dia e bandera di libertad comunidad Arubano ta bisa "Danki Betico, Danki pa tur loke bo a haci pa Aruba"

Chiquito Beauty Matrassen Fabriek

Nos ta fura matras na bon prijs.



Bo colchon ta molestiabo? Nos ta cambia tur spring y hero kibra. Laga bo colchon nobis nobis. Nos ta traha y fura colchon cu mas di 20 aña di experiencia. Yama nos libremente na: 585-1273 / 966-4777. Adres: Pos Chiquito 37B.

Ban celebra e fecha y e lucha
di nos gran estadista
Arubano...

Feliz Dia di Betico!



CMB

CARIBBEAN MERCANTILE BANK N.V.



CMCC

CARIBBEAN MERCANTILE CREDIT CO. N.V.